

民國肇縣志

葦縣志卷五

邑人

劉蓮青

纂輯

張仲友

邑人劉鎮華鑒定

邑人劉鎮海參閱

固始萬自逸讐校

大事紀

邑之提封雖隘然方之可得古小國抑或逾焉古者國
皆有史戰爭必書災患必書祭祀必書興役動眾必書
所謂紀事也邑固居乎孔道事會之迭乘千百年來成
壞之迹具在簡冊矣取其紛者而約之使後之人得有

所稽焉於是廣前編而志大事

軒轅氏

五十七年秋七月庚申鳳凰至帝祭于洛水

竹書紀年。徐文靖箋云

一本作五十年

水經注洛水又東北流入于河謂之洛納黃帝東巡河

過洛修壇沈璧受龍圖于河龜書于洛赤文綠字

陶唐氏

五十三年帝祭于洛

竹書紀年。徐箋按通鑑注曰洛水源出西安府洛南縣冢嶺山東流經

盧氏永寧宜陽洛陽偃氏鞏等縣入河

水經注堯帝又修壇河洛擇良議沈榮光出河休氣四

塞白雲起迴風逝赤文綠色廣袤九尺負理平上有列
星之分七政之度帝王錄記興亡之數以授之堯又東
沈書於日稷赤光起元龜負書背甲赤文成字遂禪於
舜

按沈約注在七十年帝使四岳錫虞舜命之下意鄭因
尚書中侯有修壇河洛之文應系之此年祭洛之下

七十五年司空禹治河

竹書紀年

禹貢導河東過洛納胡渭錐指引傳曰洛納洛入河處
正義曰洛入河處河南鞏縣東也渭按杜元凱云水曲
流爲納蓋洛水自故洛陽城南東流至偃師縣東南折
而北逕鞏縣東又北入於河謂曲流爲納亦無不可也

夏

帝太康元年帝卽位居斟鄩竹書紀年

徐箋按前漢書薛瓚注曰斟鄩在河南汲郡古文太康

居斟鄩又昭二十三年傳王師晉師圍郊郊尋潰杜注

河南鞏縣有地名鄩中括地志故鄩城在洛州鞏縣西

南五十八里

畋于洛表竹書紀年

徐箋按夏書曰太康尸位以逸豫乃盤遊無度畋于有

洛之表十旬弗返有窮后羿因民弗忍距于河

羿入居斟鄩竹書紀年

帝失國昆弟五人須于洛汭作五子之歌

史記夏本紀

帝仲康元年帝卽位居斟鄩

竹書紀年

徐箋按孔氏書疏曰羿廢太康猶立仲康不自立則是

時羿居斟尋故仲康亦居斟尋也

五年秋九月庚戌朔日有食之

竹書紀年

命胤侯帥師征羲和

竹書紀年

六年錫昆吾命作伯

竹書紀年

七年陟世子相出居商邱

竹書紀年

徐箋按劉道原通鑑外紀相爲羿所逐失國居商邱本

此

帝孔甲三年王畋于黃山竹書紀年

黃山在鞏縣北臨黃河呂氏春秋夏孔甲遊于東陽田

于黃山水經注帝王世紀以為即東首陽山隋書地理

志鞏縣有東首山舊志蓋卽山支麓也

帝癸元年帝卽位居樹鄴竹書紀年

徐鑿按括地志故鄴城在洛州鞏縣西南五十八里蓋

桀所居也國策吳起對魏武侯曰夏桀之居左河濟右

泰華伊闕在其南洋腸在其北

三年築傾宮毀容臺竹書紀年

六年岐踵戎來賓竹書紀年

十年五星錯行 竹書紀年

夜中星隕如雨 竹書紀年

地震 竹書紀年

伊洛竭 竹書紀年

徐箋按伯陽甫曰昔伊洛竭而夏亡韋昭曰禹都陽城

伊洛所近謂此也余謂桀居斟尋在鞏洛則伊洛最近

何必遠追神禹乎 按徐說諦矣惟韋昭不及見竹書未可遂加以誣謾也

十三年遷于河南 竹書紀年

殷

帝辛五十二年使膠鬲候周師 呂氏春秋

武王至鮪水殷使膠鬲候周師武王見之膠鬲曰西伯將何之無欺我也武王曰不子欺將之殷也膠鬲曰謁至武王曰將以甲子至殷郊子以是報矣水經注縣北有山臨河其下有穴謂之鞏穴直穴有渚謂之鮪渚故河自鮪穴已上又兼鮪稱呂氏春秋稱武王伐紂至鮪水紂使膠鬲候周師卽是處也按竹書紀年周始伐殷在帝辛五十二年

周

穆王東遊於黃澤宿於曲洛

穆天子傳

使宮樂謠曰黃之池其馬歛沙皇人威儀黃之澤其馬

歛玉皇人受穀

按黃澤皇人注皆不詳以傳下文南遊於黃口室之邱以觀夏后啟之所居注謂指嵩高山疑所言係嵩陰即春秋傳劉子以王猛居皇之皇杜注鞏有黃亭者是也

宣王四年公會齊侯宋公陳侯衛侯鄭伯許男曹伯滑伯

諸子同盟於幽公羊經

春秋經無公字杜注書會魯會之滑國都費詳古蹟門滑國下

襄王十二年滑人叛鄭而服於衛夏鄭公子士洩堵寇帥

師入滑左傳

十六年鄭之入滑也滑人聽命師還又即衛鄭公子士洩

堵俞彌帥師伐滑王使伯服游孫伯如鄭請滑鄭伯怨襄

王與衛滑不聽王命而執二子節錄左傳

王出及坎欲

左傳

頽叔桃子奉大叔以狄師攻王王御士將禦之王曰先

后其謂我何寧使諸侯圖之王遂出及坎欲國人納之

杜預注坎欲周地在河南鞏縣東

二十五年秦師侵鄭及滑鄭商人弦高犒師秦知鄭有備

滅滑而還

節錄左傳

三十年洛絕于洧

竹書紀年

徐箋按水經注洛水又東過偃師縣南又北陽渠水注

之竹書晉襄公六年洛絕于洧即此處也

按後魏時已無偃師縣注

陽渠水之下即云洛水又北逕偃師城東北歷郭中云云證之續漢郡國志鞏有尋谷水是洧即鞏境內

靈王二十年晉欒盈過轅轅出奔楚

左傳

晉逐欒盈奔楚過周西鄙掠之盈辭於行人王使

候出諸轅轅杜注轅轅關在緄氏縣東南顧棟高春秋

大事表在今鞏縣西南七十里姚培謙春秋左傳杜注

補輯輿地志其阪有十二曲道將去復還故名今河南

河南府鞏縣西南有轅轅山按轅轅關之屬鞏當由宋熙寧時省緄氏而改隸故

顧姚之說與杜異

景王四年王使劉夏勞晉趙武於穎館於雒汭

左傳

杜注雒汭在河南鞏縣南水曲流為汭

十五年原伯絃奔郊

左傳

原伯綏虐其輿臣使曹逃原輿人逐綏而立公子跪尋綏奔郊顧表鞏縣郊邑與鄆相近

二十五年夏四月王田於鞏國語

韋昭注鞏北山今河南縣也按即左傳之田北山杜注北山洛北芒也姚補輯芒

山今在河南府城洛陽縣東北連偃師孟津鞏二縣界

乙丑王崩于榮錡氏左傳

杜注四月十九日河南鞏縣西有榮錡瀾

六月王子朝帥郊要餞之甲以逐劉子左傳

劉子單子以王猛居于皇春秋

杜注河南鞏縣西南有黃亭辟子朝難出居皇姚補輯

京相璠曰黃亭在訾城北三里

秋七月單子以王如圃車次于皇左傳

江永春秋地理考實圃車當近鞏縣之皇

辛卯鄆肸伐皇大敗獲鄆肸左傳

杜注鄆肸子朝黨

冬十月庚申單子劉蚘以王師敗績于郊左傳

前城人敗陸渾于社左傳

陸渾戎晉籍談荀躒帥以納王者前城子朝眾顧表社

杜注周地黃河西自偃師界至鞏縣洛水入之有五社

渡又有五社津

十二月庚戌晉賈辛司馬督帥師軍于谿泉次于社左傳

與籍談荀躒同救王室者談軍於陰躒軍於侯氏杜注

鞏縣西南有明谿泉

敬王元年春正月壬寅朔二師圍郊癸卯郊鄆潰左傳

杜注二師王師晉師也河南鞏縣西南有地名鄆中郊

鄆二邑皆子朝所得

夏四月乙酉單子取訾左傳

杜注訾在河南鞏縣西南

秋七月丙辰尹辛敗劉師于鄆左傳

三年冬十月壬申尹文公涉于鞏焚東訾弗克左傳

杜注文公子朝黨於鞏縣涉洛水也東訾敬王邑

四年秋七月庚午劉子以王次于渠左傳

杜注渠周地顧表即陽渠也周公所鑿在河南鞏縣西

通洛陽按水經注洛水又北陽渠水注之竹書紀年晉襄公六年洛絕於洵即此處也

冬十月辛丑王師在郊左傳

十一月辛酉晉師克鞏左傳

杜注知躒趙鞅之師

陰不佞得寶珪獻之王與之東訾左傳

王子朝用成周之寶珪於河津人得諸河上陰不佞以

溫人南侵拘得玉者取其玉將賣之則為石王定而獻

之與之東訾杜注不佞敬王大夫喜得玉故與之邑鞏

縣西南訾城是也

按左傳書於昭公二十四年是為敬王二年謂是年子朝用寶珪於河也

云王定而獻之則應為四年子朝奔楚王入成周以後

十二年夏四月辛酉鞏賊簡公左傳

簡公棄其子弟而好用遠人鞏氏之羣子弟賊簡公

顯王二年河南惠公封其少子於鞏史記周本紀正義

正義引郭緣生述征記鞏縣周地鞏伯邑史記周顯王

二年西周惠公封少子班於鞏以奉王室為東周惠公

也

趙與韓分周為兩史記趙世家

正義引括地志云史記周顯王二年西周惠公封少子

班於鞏為東周

九年東周惠公薨

史記六國表集解

集解引徐廣曰紀年東周惠公傑薨

按史記周本紀考王十五年崩子威

烈王午立考王封其弟於河南是為桓公以續周公之官職桓公卒子威公代立威公卒子惠公代立乃封其少子於鞏以奉王號東周惠公大事記周貞定王二十八年考王初立封其弟揭於河南是為河南桓公河南桓公卒子威公立威公卒子惠公立考王十五年河南惠公復自封其少子班於鞏以奉王號東周沒亦謚惠史記之文敘河南桓公之封因及東周公之封桓公之封在考王時史記之所言也東周公之封在何時史記所不言也若大事記所言桓公之封當貞定王二十八年至考王十五年而封東周惠公考王為哀王少弟申問僅歷十五年遂傳子及孫而封至於孫之少子曾孫雖咸以孩提在抱者為之君說亦難通資治通鑑於周

顯王二年九年以無事不書通鑑外紀則書威烈王十二年西周桓公卒子威公立威公尙立於威烈王十二年烏有東周惠公乃立於考王十五年之理是小事記因周本紀考王十五年崩順敘及於東周惠公遂謂皆在此年內故鄭樵通志年譜惟用徐廣之說據其可信者而書之也徐廣所引之紀年述征記括地志所引之史記皆爲今本所無自是當時完本至名班名傑則由於所據書之異聯非子內儲曰公子朝周太子也弟公子根甚有寵於君君死遂以東周叛分爲兩國是又名根矣

十五年東周與鄭高都

竹書紀年

徐箋括地志高都故城在洛州伊闕縣北

十六年韓伐東周取陵觀廩邱

史記六國表

韓世家作邢邱胡三省通鑑注陵觀廩邱皆當時邑聚之名史無所考

赧王八年東周與西周戰韓救西周史記周本紀

楚圍雍氏韓徵甲與粟於東周史記周本紀

五十九年西周民東亡史記周本紀

秦取韓陽城負黍西周恐倍秦與諸侯約從將天下銳

師出伊闕攻秦令秦無得通陽城秦昭王怒使將軍膠

攻西周西周君奔秦盡獻其邑三十六口三萬秦受其

獻歸其君於周周君王赧卒周民遂東亡按索隱謂周君即西周武

公此時武公與王赧皆卒故連言

秦

莊襄王元年滅東周史記周本紀

東周君赧諸侯謀秦秦使相國呂不韋誅之盡入其國
秦不絕其祀以陽人地賜周君奉其祭祀

使蒙騫伐韓韓獻鞏

史記秦本紀

正義爾時秦滅東周韓亦得其地又獻於秦

漢

高帝三年楚遂拔成皋欲西漢使兵距之鞏

資治通鑑

按史記項羽本紀云漢之四年項王進兵圍成皋漢王
逃獨與滕公出成皋北門渡河走修武從張耳韓信軍
楚遂拔成皋欲西漢使兵拒之鞏令其不得西高祖本
紀無使兵拒楚於鞏之文而楚圍成皋漢王跳獨與滕
公出成皋王門北渡河馳宿修武入張耳韓信壁而奪
之軍書於三年故通鑑取項羽本紀之事從高祖本紀
而書

建武元年更始大司馬朱鮪使討難將軍蘇茂副將賈彊

將兵三萬餘人度鞏河攻温後漢書寇恂傳

章懷注臨黃河故曰鞏河也水經注作從五社津渡攻

温

遣建威大將軍耿弇率彊弩將軍陳俊軍五社津備滎陽

以東後漢書光武紀

章懷注水經注曰鞏縣北有五社津一名土社津

二年遣執金吾賈復與騎都尉陰識驍騎將軍劉植南度

五社津擊鄗後漢書賈復傳

按更始鄗王尹尊未降岑彭傳朱鮪救諸部將曰我若不還諸君逕將大兵上轅轅歸鄗王光武亦曰鄗最彊

故復等度五
社津擊尊

中平元年三月置八關都尉官

後漢書
靈帝紀

章懷注八關謂函谷廣城伊闕大谷轅轅旋門小平津

孟津也

按時黃巾一時俱起京師震動皇甫嵩傳詔勅州郡修理攻守簡練器械自函谷大谷廣城伊闕轅轅旋門孟津小平津諸關並置都尉

六年八月申常侍張讓段珪等劫少帝陳留王走小平津

後漢書
靈帝紀

讓珪等殺大將軍何進於是虎賁中郎將袁術燒東西

宮攻宦者司隸校尉袁紹勒兵收偽司隸校尉樊豐

南尹許相及諸閹人無少長皆斬之讓珪等劫少帝陳留王走小平津尙書盧植追讓等斬數人其餘投河而死帝與陳留王協夜步逐熒光行數里得民家露車共乘之還宮

初平元年董卓潛使兵從小平津過破河內太守王匡

後漢書董卓傳

時河內太守王匡屯兵河陽津將以圖卓卓遣疑兵挑戰而潛使銳卒從小平津過津北破之

晉

泰始十年作河橋

晉書杜預傳

杜預以孟津渡險有覆沒之患請建河橋於富平津議者難之預曰造舟爲梁河橋之謂也及橋成帝從百僚臨會舉觴屬預曰非君此橋不立也

永寧元年司馬虔棄軍於九曲

晉書趙王倫傳

趙王倫敗帝反正倫子虔自河北還至九曲詔遣使者免虔官虔懼棄軍將數十人歸於汝陽里尋伏誅

永嘉五年太子左率溫畿夜開廣莫門奔小平津

晉書懷帝紀

時劉曜王彌石勒同寇洛川王師頻爲賊所敗

建武元年劉聰使其子粲及劉雅等伐趙固次於小平津

晉書劉

聰載記

李矩傳粲率劉雅生等步騎十萬屯孟津北岸

大興元年冠軍將軍李矩遣郭誦屯洛口以救趙固

晉書李矩

傳

劉聰載記李矩使郭默郭誦救趙固屯於洛汭遣耿稚張皮潛濟襲粲貝邱王翼光自厘城覘知之以告粲粲曰征東南渡趙固望聲逃竄彼方憂自固何暇來邪且聞上身在此自當不敢北視況敢濟乎不須驚動將士也是夜稚等襲敗粲軍粲奔據陽鄉稚館穀粲壘雅聞而馳還柵於壘外與稚相持聰聞粲敗使太尉范隆率騎赴之稚等懼率衆五千突圍趨北山而南劉勳追之

戰於河陽稚師大敗

太寧三年後趙將石虎敗趙將劉岳於洛西晉書劉曜載記

劉岳攻石勒盟津石梁二戍剋之進圍石生於金墉石

虎率步騎四萬人自成皋關岳陳兵以待之戰於洛西

岳師敗績岳中流矢退保石梁

按洛西方輿紀要云蓋洛口西也

咸和三年後趙石勒出鞏訾之間救洛陽晉書石勒載記

劉曜敗石虎於高候遂圍洛陽勒統步騎四萬赴金墉

諸軍集於成皋勒見曜無守軍乃卷甲銜枚而詭道兼

路出於鞏訾之間

永和十年河南太守戴施奔鮪渚

晉書穆帝紀

按八年殷浩北伐遣戴施據石門至是年冉閔將周成舉兵反自宛陵襲洛陽石門在滎陽施當已入洛陽因成兵來襲故奔鮪渚

隆和元年慕容暉將呂護等退守小平津

晉書穆帝紀

護寇洛陽遣北中郎將庾希竟陵太守鄧遐以舟師救洛陽護等退守小平津

太元八年苻堅將慕容垂自涼馬臺結草筏渡河

資治通鑑

胡三省注此涼馬臺蓋在富平津橋之西也

十二年松滋太守王遐之討翟遼於洛口敗之

晉書孝武帝紀

義熙十二年姚泓征南將軍鎮洛陽姚洸遣將趙玄南守

柏谷塢石無諱東戩鞏城

晉書姚泓載記

時太尉劉裕西伐秦之陽城及成皋滎陽虎牢諸城皆

降冠軍將軍檀道濟等長驅而至無諱至石關奔還

按鞏縣古有石關

黑石關兩地名

太尉參軍南陽太守毛德祖破柏谷塢趙玄死之

晉書姚泓載記

先是玄說姚洸固守金墉待援而洸司馬姚禹潛通於

檀道濟固勸洸出戰洸乃遣玄率精兵千餘南守柏谷

塢與德祖戰以衆寡而敗被創十餘與其司馬寒鑿皆

死於陣

按宋書王鎮惡傳謂鎮惡破虎牢及柏谷塢斬賊帥趙玄時德祖爲鎮惡司馬宋書蓋以勳歸於德祖而載記所

言爲
詳

十三年太尉劉裕西入長安舟師堡於柏谷塢以其子桂

陽縣公義真留守

水經注及宋書廬陵孝獻王義真傳

水經注洛水又東逕百谷塢北戴延之西征記曰塢在

川南因高爲塢高一十餘丈劉武王西入長安舟師所

堡也宋書廬陵孝獻王義真傳年十二從北征大軍進

長安留守柏谷塢

按水經注及義真傳皆不著年以劉裕入長安言之應爲義熙十三年又宋書向靖傳明年高祖北伐彌侍從留戍碯礮進屯石門柏谷系於十年之下則爲義熙十一年劉裕以十二年始發建康靖無緣十一年進屯柏谷似與義真之留守柏谷爲一事裕豈肯留十二歲之幼子而不置將以佐之乎

十四年鞏縣人宗曜於其田所獲嘉禾九穗同莖太尉劉

裕以獻帝以歸於裕裕讓乃止南史宋武帝紀

元熙元年司馬楚之屯柏谷塢資治通鑑

按姚泓既亡之後晉之宗室奔秦者復逃亡在河南

宋

永初三年冠軍將軍司州刺史毛德祖遣鞏令臣琛五百

人固小平宋書索虜傳

後魏

太和十八年十月河南上言鞏縣木連理魏書靈徵志

二十年九月帝閱武於小平津魏書孝文帝紀

景明二年帝幸小平津咸陽王禧謀反覺出奔獲之於柏

谷塢賜死

魏書咸陽王禧傳

時禧在城西小宅初欲勒兵直入金墉衆懷沮異禧心

因緩乃與臣妾向洪池別墅將士所在追禧禧自洪池

東南走渡洛水至柏谷塢被擒

孝昌中都督趙昶鎮小平津

周書趙昶傳

武泰元年羣盜燒劫鞏縣以西關口以東公路澗以南詔

武衛將軍李神軌爲都督討平之

魏書孝明帝紀

按費于傳附費穆傳妖賊李洪於陽城起逆連結蠻左
詔穆兼武衛將軍率衆討擊破於關口之南又崔挺傳
附崔孝暉傳武泰初蠻首李洪扇動諸蠻詔孝暉爲別
將隸都督李神軌討平之又李崇傳附李神軌傳武泰

初蠻帥李洪扇動諸落伊闕以東至於鞏縣多被燒劫
詔神軌爲都督破平之是紀言羣盜實羣蠻而李洪爲
渠率也

余朱榮向洛靈太后令武衛將軍費穆屯小平

魏書費于
傳附費穆

傳

榮推奉莊帝河梁不守穆遂棄衆先降穆素爲榮所知
見之甚悅穆潛說榮曰公士馬不出萬人今長驅向洛
前無橫陳者正以推奉主上順民心故耳旣無戰勝之
威羣情素不厭伏今以京師之衆百官之盛一知公之
虛實必有輕侮之心若不大行誅罰更樹親黨公還北
之日恐不得度太行而內難作矣榮心然之於是遂有

河陰之事天下聞之莫不切齒

尔朱榮署平鑿參軍前鋒從平鞏密

北齊書平鑿傳

永安二年元顥敗於河橋南出轅轅

方輿紀要

顥奔梁梁武帝使陳慶之納之入洛陽既而敗於河橋

輕騎南走自轅轅出至臨潁為人所殺

接河橋晉泰始十年

杜預所造在富平津

太昌元年帝幸都水南過洛汭遂至瀍澗

魏書出帝紀

承熙三年左光祿大夫段承討賊魁元伯生破平之

周書段承

傳

時有賊魁元伯生率數百騎西自崞潼東至鞏洛屠陷

塢壁所在爲患孝武帝遣京畿大都督匹婁昭討之昭請以五千人行永進曰此賊旣無城柵惟以寇抄爲資安則蟻聚窮則鳥散取之在速不在衆也若星馳電發出其不虞精騎五百自足平殄若徵兵而後往彼必遠竄雖有大衆無所用之帝然其計於是命永代昭永覘知所在倍道兼進遂破平之

按永傳破平元伯生無年月下文云帝西遷永時不及從是爲永熙三年事

大統四年驃騎將軍楊擲攻東魏柏谷塢拔之

周書本傳

邙山之戰擲攻拔柏谷塢因卽鎮之及大軍不利擲亦

拔還

九年開府于謹攻東魏柏谷塢拔之

周書文帝紀

按怡峰傳與于謹平柏谷塢泉企傳附子仲遵傳仲遵隨于謹攻柏谷塢仲遵力戰先登擒其將王顯明

後齊

武平二年三月太宰段韶蘭陵王長恭將兵禦周攻柏谷

城拔之而還

資治通鑑 胡三省注曰此齊遣段韶等出伊洛以牽制汾北也

二月周師來寇遣韶與右丞相斛律光太尉蘭陵王長

恭同往捍禦以三月暮行達西境有柏谷城者乃敵之

絕險石城千仞諸將莫肯攻圍韶曰汾北河東勢為國

家之有若不去柏谷事同痼疾計彼援兵會在南道今

斷其要路救不能來且城勢雖高其中甚狹火弩射之

一旦可盡諸將稱善遂鳴鼓而攻之城潰獲儀同薛敬

禮大斬獲首虜北齊書段榮傳附韶傳

後周

建德四年齊王憲圍齊洛口收其東西二城周書本傳

守王藥城儀同三司韓正以城降齊周書武帝紀

時周師伐齊齊王憲及于翼李穆等所在克捷降拔三

十餘城皆棄而不守惟以王藥城要害令韓正守之正

尋以城降齊

按方輿紀要城在鞏東北濱河

隋

大業元年八月帝行幸江都自漕渠出洛口御龍舟

資治通鑑

大業雜記曰車駕幸江都自漕渠口下乘小朱航行次

洛口御龍舟皇后御翔螭舟其龍舟高四十五尺闊五

十尺長二百尺四重上一重有正殿內殿東西朝堂周

以軒廊中二重有一百六十房皆飾以丹粉妝以金碧

珠翠雕刻奇麗綴以流蘇羽葆朱絲纓絡下一重長秋

內侍及乘舟水手以素絲大條繩六條兩岸引進其引

船人並名殿腳一千八十人俱著雜錦綵妝襖子行纏

鞋襪等分爲三番皇后御次水殿名翔螭其殿腳有九

百人又有小水殿九名浮景舟並三重朱絲纓絡已下

殿腳爲兩番番一百人諸續如乘大朱航三十六名漾
綵船並兩重加纓絡殿腳百人又有朱鳥船蒼龍船白
虎船玄武船各二十四其駕船人名船腳又有飛羽船
六十青鳧舸十凌波舸十宮人習水手者乘之又有五
樓船三樓船二樓船板榻黃葭舫並給黃衣夫又有平
乘五百艘青龍五百艘艨艟五百艘八櫂舸二百艘舩
艦舸二百艘並十二衛兵所乘載兵器帳幕兵士白乘
不給夫發洛口部

移鞏縣治於洛口

方輿
紀要

水經洛水又東北過鞏縣城東酈注洛水又東經鞏縣

故城南東周所居也蓋桑欽西漢人而曰過縣東則作
經時縣猶在洛西故鞏城也道元後魏人而已曰爲故
鞏城則後魏以前縣治已移洛水南今縣也至隋大業
初移縣治洛口乃自今縣治而移與故城無涉

二年十月置洛口倉於鞏東南原上

資治通鑑

築倉城周回二十餘里穿三千窖窖容八千石以還置
監官并鎮兵千人

按洛口倉一名興洛倉河南府志興洛倉卽洛口也隋
置倉於鞏者以鞏東南原土地高燥可穿窖久藏且下
通河洛漕運也方輿紀要曰隋以前縣與成皋中分洛
水爲界西則鞏東則成皋隋置洛口倉而鞏與成皋之
界相錯矣景氏說嵩謂洛口倉卽秦敖倉舊址理或然也今猶名窖糧坑

七年七月運洛口倉米至涿郡資治通鑑

帝發江淮以南民夫及船運黎陽及洛口諸倉米至涿郡舳艫相次千餘里載兵甲及攻取之具往還在道常數十萬人填咽於道晝夜不絕死者相枕臭穢盈路天下騷動

下騷動

八年八月敕運洛口倉穀向望海頓資治通鑑

十二年七月帝幸江都次鞏縣資治通鑑

虞世基以盜賊充斥請發兵屯洛口倉帝曰卿是書生定猶懼怯車駕至鞏勅有司移箕山公路二府於倉內仍令築城以備不虞胡三省注曰新唐志河南有府三

十九有鞏洛府無箕山公路二府疑移於倉內後遂并爲鞏洛府也

十三年二月賊帥李密翟讓等陷興洛倉

隋書煬帝紀

李密說翟讓曰今東都空虛兵不素練越王仲幼留守諸官政令不一士民離心段達元文都闇而無謀以僕料之彼非將軍之敵若將軍能用僕計天下可指麾而定今百姓饑饉洛口倉多積粟去都百里有餘將軍若親率大衆輕行掩襲彼遠未能救又先無豫備取之如拾遺耳比其聞知吾已獲之發粟以賑窮乏遠近孰不歸附百萬之衆一朝可集枕威養銳以逸待勞縱彼能

來吾有備矣然後檄召四方引豪傑而資計策選驍悍
 而授兵柄除亡隋之社稷布將軍之政令豈不盛哉讓
 曰此英雄之略非僕所堪惟君之命盡力從事請君先
 發僕為後殿密讓將精兵七千人出陽城北踰方山自
 羅口襲興洛倉破之開倉恣民所取老弱襁負道路相

屬資治
通鑑

胡三省資治通鑑注曰鞏縣有興洛倉魏收地形志鞏
 縣有長羅川羅口蓋即長羅川口水經羅水出方山西
 北流謂之長羅川又西北
 過訾城東北而入於洛

越王侗遣虎賁郎將劉長恭光祿少卿房胤率步騎二萬

五千討李密反為所敗

隋書煬帝紀
 及李密傳

時東都人皆以密爲饑賊盜米烏合易破爭來應募國子三館學士及貴勝親戚皆來從軍器械修整衣服鮮華旌旗鉦鼓甚盛長恭等當其前使河南捕討大使裴仁基等將所部兵自汜水而入以掩其後約十一日會於倉城南密讓具知其計東都兵先至士卒未朝食長恭等驅之度洛水陳於石子河西南北十餘里密讓選驍雄分爲十隊令四隊伏橫嶺以待仁基以六隊陳於石子河東長恭等見密兵少輕之讓先接戰不利密率麾下橫衝之隋兵饑疲遂大敗長恭等解衣潛竄得免奔還東都士卒死者什五六越王侗釋長恭等罪慰撫

之密讓盡收其輜重器甲威聲大振

資治通鑑

李密自號魏公稱元年

隋書煬帝紀

讓於是推密爲主上密號爲魏公鞏南設壇場卽位稱元年大赦其文書行下稱行軍元帥府其魏公府置三司六衛元帥府置長史以下官屬拜程讓爲上柱國司徒東郡公亦置長史以下官減元帥府之半以單雄信爲左武侯大將軍徐世勣爲右武侯大將軍各領所部房彥藻爲元帥左長史邴元真爲右長史楊德方爲左司馬鄭德韜爲右司馬祖君彥爲記室其餘封拜各有差於是道路降者不絕如流衆至數十萬

資治通鑑

通鑑考異曰二月丙辰密遣其將夜襲倉城二府兵擊退之己未又悉衆來攻而府兵敗遂入據倉然二府將士猶各固小倉城二十餘日不下既而外救不至倉又盡城乃陷沒死者大半密開倉招納降者日數百千人於是趙魏以南江淮以北莫不歸附自是賊徒滋蔓矣○按二月壬午朔無丙辰等日今從隋書

李密城洛口 隋書李密傳

命其護軍田茂廣築洛口城方四十里而居之 資治通鑑

通鑑考異曰壺關錄云周四十八里今從隋書按隋書密傳書城洛口在號魏公卽位稱元年之前舊唐書唐書書在後通鑑據兩唐書

四月李密攻下鞏縣獲縣長柴孝和 隋書李密傳

李密以孟讓爲總管帥步騎二千人入東都外郭於是

孝和監察御史鄭頽以城降密密以孝和爲護軍頽爲

右長史

資治通鑑

裴仁基屯百花谷請降於李密

資治通鑑

倉城之戰仁基失期不至聞劉長恭等敗懼不敢進屯

百花谷固壘自守又恐獲罪於朝李密知其狼狽使人

說之暗以厚利仁基遣賈閏甫詣密請降密大喜遣仁

基書慰納之仁基還屯虎牢帥其眾降密

胡三省注曰百花谷蓋在汜水縣西鞏縣東南

五月李密棄迴洛倉歸洛口

隋書李密傳

隋書李密傳裴仁基以武牢歸密因遣仁基與孟讓率

兵二萬餘人襲迴洛倉破之燒天津橋遂縱兵大掠東

都出兵乘之仁基等大敗僅以身免密復親率兵三萬
逼東都將軍段達武賁郎將高毗劉長恭等出兵七萬
拒之戰於故都官軍敗走密復下迴洛倉而據之密時
兵鋒甚銳每入苑與官軍連戰會密爲流矢所中卧於
營內後數日東都出兵擊之密衆大潰棄迴洛倉歸洛
口北史李密傳武賁郎將裴仁基以武牢歸密密因遣
仁基與孟讓襲破迴洛倉據之密時兵鋒甚銳每入苑
與官軍連戰會密爲流矢所中卧於營內東都出兵擊
之密衆大潰棄迴洛倉歸洛口舊唐書李密傳裴仁基
率其子行儼以武牢歸密因遣仁基與孟讓率兵三萬

逼東都將軍段達虎賁郎將高毗劉長恭等出兵七萬
拒之戰於故都城隋軍敗走密復下迴洛倉而據之大
修營塹以逼東都密將兵鋒甚銳每入苑與隋軍連戰
會密爲流矢所中臥於營內東都復出兵乘之密衆大
潰棄迴洛倉歸於洛口唐書李密傳隋虎牢將裴仁基
長白山賊孟讓以所部歸密以仁基與讓率兵二萬襲
迴洛倉守之入都城掠居人火天津橋隋出軍乘之仁
基等敗還保鞏司馬楊德方戰死密自督衆三萬破隋
軍於故城復得迴洛倉是時隋軍益出密負銳急與之
戰中流矢卧營中隋軍乘之密衆潰棄倉守洛口資治

通鑑密遣裴仁基孟讓帥二萬餘人襲迴洛東倉破之
遂燒天津橋縱兵大掠東都出兵擊之仁基等敗走密
自帥衆屯迴洛倉東都兵尚二十餘萬乘城擊柝晝夜
不解甲密攻偃師金墉皆不克乙未還洛口又曰煬帝
命監門將軍龐玉虎賁郎將霍世舉將關內兵援東都
時密兵鋒甚銳每入苑與隋兵連戰會密爲流矢所中
尙卧營中丁丑越王侗使段達與龐玉等夜出兵陳於
迴洛倉西北密與裴仁基出戰達等大破之殺傷太半
密乃棄迴洛奔洛口

按隋書北史舊唐書唐書皆一言密棄迴洛倉歸洛口
在東都出兵擊之密衆大潰之時未嘗兩言其還奔洛

口惟唐書言仁基等敗還保鞏非謂密也通鑑謂密攻
偃師金墉皆不克還洛口又云密乃棄迴洛奔洛口與
隋書北史兩唐書皆不合觀考異謂畧記雜記蒲山公
傳月日交錯皆不可憑今從隋唐書與趙毅承蒲山公
傳誤以密一敗分為二
事則正文似有舛誤

九月煬帝特詔王世充大發兵於洛口拒李密

舊唐書王世充傳并

資治通鑑

七月煬帝遣江都通守王世充將江淮勁卒將軍王隆

帥叩黃蠻河北大使太常少卿韋霽河南大使虎牙郎

將王辯等各帥所領同赴東都相知討李密九月王世

充韋霽王辯及河內通守孟善並河陽都尉獨孤武都

各帥所領會東都惟王隆後期不至越王侗使虎賁郎

將劉長恭等帥留守兵龐玉等帥偃師兵與世充等會

十餘萬眾擊李密於洛口與密夾洛水相守煬帝詔諸

軍皆受世充節度資治通鑑

考異曰畧記云世充擊密罔不摧破露布相續而來百姓忻忻歌詠於道蒲山公傳云自秋徂冬凡經三十餘

戰世充多敗績河洛記云四十餘賊世充無功三書相違莫知孰是今皆不取惟勝負有顯狀者存之

李密陷箕山府城殺郎將張季珣節錄資治通鑑胡三省注曰大業十二年移箕

山公路二府守洛口倉

考異曰隋書季珣傳云密攻之經三年遂為所陷又云密壯而釋之翟讓從求金不得遂殺之河洛記曰自三

月至九月不下後為糧盡水竭乃被摧陷生獲珣於牙門遣人宣之以降為度珣更張目極罵不肯低屈遂殺

之按密明年已降唐安得三年攻守箕山之事今參取二書去其牴牾者而已

按唐書李密傳攻張珣河陰
舉之似誤張季珣職官有傳

十月壬世充陳洛北李密度洛與戰大敗密還洛南突世

充營世充奔還師徒多喪

參唐書資治通鑑

唐書李密傳王世充選卒十萬擊密世充營洛西戰不利更陳洛北登山以望洛口密引度洛與世充戰密兵多騎與長槊而北薄山地隘騎進不得騁世充多短兵盾攢鏖之密軍卻世充乘勝進攻密月城密還洛南引而西突世充營世充奔還師徒多喪孝和溺死洛水密哭之慟自是大小六十餘戰資治通鑑十月壬寅王世充夜度洛水營於黑石明日分兵守營自將精兵陳於

洛北李密聞之引兵度洛逆戰密兵大敗柴孝和溺死
密帥麾下精騎度洛南餘衆東走月城世充追圍之密
自洛南策馬直趨黑石營中懼連舉六烽世充釋月城
之圍狼狽自救密還與戰大破之斬首三千餘級

十一月王世充李密戰於石子河世充大敗

資治通鑑

王世充自洛北之敗堅壁不出越王侗遣使勞之世充
慚懼請戰於密丙辰與密夾石子河而陳密布陳南北
十餘里程讓先與世充戰不利而退世充逐之王伯當
裴仁基從旁橫斷其後密勒中軍擊之世充大敗西走

李密遣蔡建擊殺程讓并其兄姪及王儒信

唐書李密傳

崔讓司馬王儒信勸讓自爲大家宰總饒衆務以奪密
權讓不從讓兄柱國滎陽公弘粗愚人也謂讓曰天子
汝當自爲奈何與人汝不爲者我當爲之讓但大笑不
以爲意密聞而惡之總管崔世樞自鄆陵初附於密讓
囚之私府責其貨世樞營求未辦遽欲加刑讓召元帥
府記室邢義期博逡巡未就杖之八十讓謂左長史房
彥藻曰君前破汝南大得寶貨獨與魏公全不與我魏
公我之所立事未可知彥藻懼以狀告密因與左司馬
鄭頰共說密曰讓貪悞不仁有無君之心宜早圖之密
曰今安危未定遽相誅殺何以示遠頰曰毒蛇螫手壯

士解腕所全者大故也彼先得志悔無所及密乃從之
置酒召讓戊午讓與兄弘及兄子司徒府長史摩侯同
詣密密與讓弘裴仁基郝孝德共坐單雄信等皆立侍
房彥藻鄭頌往來檢校密曰今日與達官飲不須多人
左右只留給使而已密左右皆引去讓左右猶在彥藻
白密曰今方爲樂天時甚寒司徒左右請給酒食密曰
聽司徒進止讓曰甚佳乃引讓左右盡出獨密下壯士
蔡建德持刀立侍食未進密出良弓與讓習射讓方引
滿建德自後斫之踏於牀前聲若牛吼并弘摩侯儒信
皆殺之徐世勣走出門者斫之傷頸王伯當遙訶止之

單雄信叩頭請命密釋之左右驚擾莫知所爲密大言
曰與君等同起義兵本除暴亂司徒專行暴虐陵辱羣
僚無復上下今所誅止其一家諸君無預也命扶徐世
勣置幕下親爲傅瘡讓麾下欲散密使單雄信前往宣
慰密尋獨騎入其營歷加撫諭令世勣雄信伯當分領
其衆中外遂定讓殘忍摩侯猜忌儒信貪縱故死之日
所部無哀之者密之將佐始有自疑之心矣始王世
充知讓與密必不久陸冀其相圖得從而乘之及聞讓
死大失望歎曰李密天資明決爲龍爲蛇固不可測也

資治

通鑑

十二月王世充夜襲倉城李密逆拒破之斬虎賁郎將費

青奴

隋書李密傳

庚子王世充軍士有亡降李密者密問世充軍中何所爲軍士曰比見益募兵再饗將士不知其故密謂裴仁基曰吾幾落奴度中光祿知之乎吾久不出兵世充芻糧將竭求戰不得故募兵饗士欲乘月晦以襲倉城耳宜速備之乃命平原公郝孝德琅邪公王伯當齊郡公孟讓勒兵分屯倉城之側以待之其夕三鼓世充兵果至伯當先遇之與戰不利世充兵卽陵城總管魯儒拒卻之伯當更收兵擊之世充大敗斬其驍將費青奴士

卒戰溺死者千餘人世充屢與密戰不勝越王侗遣使

勞之世充訴以兵少數戰疲倣侗以兵七萬益之資治通鑑

十四年正月王世充屯鞏北造浮橋度洛擊李密世充大

敗北趣河陽資治通鑑

王世充既得東都兵進擊李密於洛北敗之遂屯鞏北

辛酉世充命諸軍各造浮橋度洛擊密橋先成者先進

前後不一虎賁郎將王辯破密外柵密營中驚擾將潰

世充不知鳴角收眾密因率敢死士乘之世充大敗爭

橋溺死者萬餘人王辯死世充僅自免洛北諸軍皆潰

世充不敢入東都北趣河陽是夜疾風寒雨軍士涉水

沾溼道路凍死者又以萬數世充獨與數千人至河陽

考異曰隋書北史李密傳曰世充復移營洛北南對鞏縣其後遂於洛水造浮橋悉衆以擊密密出擊之官軍稍卻自相陷溺者數萬人世充僅而獲免不敢還東都遂趣河陽其夜雨雪尺餘衆隨之者死亡殆盡王世充傳曰充敗績赴水溺死者萬餘人時天寒大雪兵士既度水衣皆霑溼在道凍死者又數萬人蒲山公傳曰世充移營就洛水之北與密隔洛水以相望密乃築長城掘深壘周迴七十里以自固十五日世充與密戰於石窟寺東密軍退敗世充度洛水以乘之逼倉城爲營塹密縱兵疾戰世充兵馬棄仗奔亡沈溺死者不可勝數密又令露布上府曰世充以今月十一日平旦屯兵洛北偷入月城其月十五日世充及王辯才等又於倉城北偷渡水南敢逼城堞河洛記曰十六日充與密戰於石窟寺東又曰其夜遇風寒疾雨士卒凍死十不存一充脫身宵遁直向河陽餘如蒲山公傳畧記曰辛酉王世充移兵洛北仍令諸軍臨岸布兵軍別造浮橋橋先成者輒渡旣前後不一而李密伏發我師敗績爭橋赴水溺死者十五六雜記曰十二月越王遣太常少卿韋

霽等率留守兵三萬並受世充節度又曰王辯縱等敗
眾軍亦潰爭橋赴水死者大半王辯縱等皆沒惟世充
敗免與數百騎奔大通城敗兵得還者於道遭大雨凍
死者六七千人世充停留大通十餘日懼罪不還十四
年正月越王遣世充兄世憚往大通慰諭赦世充喪師
之罪按李道玄勸進於李密表云于時律始太蔭未宜
震霖雨過雨忽降凍殆將盡今參取
眾書曰從蒲山公傳雨從河洛記
按是役戰沒於陣者自王辯外尚有楊威霍世舉劉長
恭梁德重董智通皆虎賁郎將見隋書北史舊唐書李
密傳

柏谷降李密 資治通鑑

李密將張善相北出羅口 方輿紀要

張善相為伊州刺史據襄城自襄城北出羅口

四月李密據鞏洛以拒宇文化及

按字文化及以三月弒煬帝至是月則大業之號已絕而代王義寧之號不能施於東都越王又未卽位故仍係之大業十四年之下

皇泰元年七月太尉尙書令東南道大行臺行軍元帥魏國公李密西還鞏洛

按越王之卽帝位得乎喪君有君之正則皇泰之號宜書李密旣受皇泰帝之命又能拒字文化及得乎爲國討賊之義則宜具書其官

九月李密守洛口將邴元真以城降王世充

初世充乏食密少帛請交相易難之邴元真好利陰勸密許焉後世充士飽降者益少密悔而止世充悉衆決戰先以騎數百度河密遣迎戰驍將十餘人皆被創返

明日密留王伯當守金墉自引精兵出偃師北阻邙山待之密議所便裴仁基曰世充悉勁兵來東都必虛請選衆二萬向洛世充必自跋歸我整軍徐還兵法所謂彼歸我出彼出我歸以疲之也密眩於衆不能用仁基擊地歎曰公後必悔遂出兵陳世充陰索貌類密者使縛之旣兩軍接埃霧躡塞世充軍江淮士出入若飛密兵心動世充督衆疾戰使索類密者過陳諫曰獲密矣士皆呼萬歲密軍亂遂潰裴仁基祖君彥皆爲世充所禽偃師劫鄭頴叛歸世充密提衆萬餘馳洛口將入城酈元真已輸款世充潛導其軍密知不發期世充兵半

洛水掩擊之候騎不時覺比出世充絕河矣卽引騎遁
武牢元眞遂降衆稍散初密建號登壇疾風鼓其衣幾
仆及卽位狐鳴於旁惡之及將敗鞏數有回風發於地
激沙礫上屬天白日爲晦屯營羣鼠相銜尾西北度洛
經月不絕節錄唐書
李密傳

唐

武德三年七月詔秦王世民擊王世充遣上谷公王君廓

自洛口斷其餉道資治通鑑

九月王君廓下轅轅羅川二縣參唐書王世充傳王君廓傳

按羅川爲鞏縣地在轅轅東北

四年二月王世充別將軍雄信裴孝達與總管王君廓相

持於洛口

資治通鑑

秦王世民帥步騎五千援之至轅轅雄信等遁去君廓

追敗之

三月秦王世民出兵趨鞏而去入虎牢

資治通鑑

時竇建德救王世充遺書世民講和修好世民不許乃

申分麾下使屈突通等副齊王守東都自將驍騎東趨

虎牢正晝出兵歷北邙抵河陽趨鞏而去世充登城望

見莫之測也竟不敢出世民遂入虎牢

五月王世充鞏縣降唐

資治通鑑

開元五年六月鞏縣暴雨連日山水泛漲壞郭邑廬舍七

百餘家人死者七十二

舊唐書
五行志

八年六月東都暴雨穀水泛漲鞏縣廬舍蕩盡

舊唐書
玄宗紀

元和□年洛口黃河清

東都留守權德輿表曰臣得進奏官狀伏承河陽奏汜

水西界從洛口黃河清一百六十里

節錄文苑英華

光啟三年李罕之營於洛口

五代史

張全義傳諸葛仲方部將劉經與李罕之爭據洛陽罕

之敗經於聖善寺乘勝欲攻河陽營於洛口經遣全義

拒之

按舊五代史李罕之傳營於鞏縣

光化三年割鞏縣隸河陽舊唐書昭宗紀

朱全忠奏河陽先管澤州今緣蕃戎占據得失不常請

權割河南府王屋河清鞏三縣隸河陽從之

後梁

開平三年魏博節度使羅紹威請置水運倉入洛口舊五代史

羅紹威傳

紹威嘗以臨淄海岱罷兵歲久儲庾山積惟京師軍民多而食益寡願於太行伐木下安陽淇門斲船三百艘置水運自大河入洛口歲漕百萬石以給宿衛

後唐

同光三年七月洛水泛漲鞏縣河堤破壞廩倉五代史

宋

乾德元年十二月卜安陵於鞏縣宋史太祖紀

太祖建國號宣祖曰安陵安陵在京城東南隅乾德初

改卜河南府鞏縣西南四十里訾鄉鄧封村宋史禮志

二年二月治安陵隧壞役兵壓死者二百人命有司瘞郵

宋史太祖紀

四月葬昭憲皇太后孝明皇后於安陵宋史太祖紀

四年命內人詣鞏縣安陵薦寒衣遂爲定式文獻通考

開寶九年三月次鞏縣拜安陵號慟頃絕者久之宋史太祖紀

按宋史兵志開寶以後募子弟為雲騎以其次為武騎又選騎兵之次等為武騎又選本軍年多者為帶甲贖員指揮十五鞏二而不得置之之年故附之

太平興國二年四月葬太祖於永昌陵宋史太宗紀

陵在鞏縣耐宣祖曰永昌宋史禮記

四年置勇捷指揮一於鞏宋史兵志

八年六月河南府澍雨洛水漲五丈餘壞鞏縣官署軍營

民舍殆盡宋史五行志

按宋史兵志太平興國中詔送兩浙兵歸京師立順聖指揮一鞏不得其年附之

雍熙三年置廣德總指揮一於鞏宋史兵志

淳化四年置橋道指揮一於鞏

宋史兵志

至道三年孝章皇后陪葬永昌陵

宋史太宗紀

十月葬太宗於永熙陵

宋史真宗紀

置衛士五百人於陵所作殿以安御容朝暮上食四時

致祭焉

宋史禮志

十一月緣山陵役民賜租有差

宋史真宗紀

咸平三年置神威指揮二於鞏

宋史兵志

景德四年正月次永安鎮帝素服詣諸陵

宋史真宗紀

詔置永安縣及三陵副使都監

宋史真宗紀

大中祥符元年九月鞏縣柴務牡丹華

宋史五行志

四年正月陳幄殿於訾村望拜諸陵宋史真宗紀

按祀汾陰經永安縣也

三月詔朝陵自西京至鞏縣不舉樂謁安陵永昌諸陵宋史

真宗紀

按祀汾陰畢歸

宣示永安縣永安指揮兵八千餘人以奉諸陵其知軍額猶隸西京本城廂軍可賜名奉先指揮升為禁軍在清塞

之下宋史兵志

五年置威武二指揮於鞏宋史兵志

乾興元年二月命丁謂為山陵使宋史仁宗紀

三月山陵按行使藍繼宗言據司天監定永安縣東北六

里曰臥龍岡堪充山陵詔雷允恭覆案以聞

宋史
禮志

六月己酉命參知政事王曾按視山陵皇堂庚申入內侍省押班雷允恭坐擅移皇堂伏誅丁謂罷爲太子少保

分司西京甲子改命馮拯爲山陵使

宋史
仁宗紀

山陵事起允恭請效力陵上章獻后曰吾慮汝有妄動恐爲汝累也乃以爲山陵都監允恭馳至陵下司天監邢中和爲允恭言今山陵上百步法宜子孫類汝州秦王墳允恭曰何不就中和曰恐下有石與水爾允恭曰上無它子若如秦王墳何不可中和曰山陵事重踏行

覆案動經月日恐不及七月之期耳允恭曰第移就上
穴我走馬入見太后言之允恭素貴橫人不敢違卽改
穿上穴入白其事章獻后曰此大事何輕易如此允恭
曰使先帝宜子孫何惜不可章獻后意不然曰出與山
陵使議可否時丁謂爲山陵使允恭具道所以謂唯唯
而已允恭入奏曰山陵使亦無異議矣既而上穴果有
石石盡水出允恭竟以是并坐盜金寶賜死籍其家中
和流沙門島謂尋竄海上

宋史雷允恭傳

九月命以天書從葬

宋史仁宗紀

十一日帝與輔臣議及天書皆先帝尊道膺受靈貺殊

尤之瑞屬於元聖不可留於人間宜於永定陵奉安二

十三日奉道天書至長春殿帝上香再拜奉辭二十四

日天書先發

宋史禮志

十月葬真宗於永定陵

宋史仁宗紀

蠲山陵役戶田租

宋史仁宗紀

天聖七年七月以玉清昭應宮災遣官告諸陵

宋史仁宗紀

明道二年三月皇太后崩呂夷簡為山陵使

宋史仁宗紀

四月以大行皇太后五使並兼追尊皇太后園陵使

宋史仁宗紀

紀

十月祔葬莊獻明肅皇太后莊懿皇太后於永定陵

宋史仁宗紀

紀

緣二太后陵應奉民戶免租賦科役有差宋史仁宗紀

景祐四年二月葬莊惠皇后於永定陵宋史仁宗紀

皇祐八年十月葬仁宗於永昭陵宋史英宗紀

十一月免山陵役戶租宋史英宗紀

治平元年京師自夏歷秋久雨不止摧真宗及穆獻懿三

后陵臺宋史五行志

三年正月詔以濮安懿王瑩為園置守衛吏即園立廟宋史

英宗紀

丙出皇太后手詔曰吾聞羣臣議請皇帝封崇濮安懿

王至今未見施行吾載閱前史乃知自有故事濮安懿
王譙國夫人王氏襄國夫人韓氏仙遊縣君任氏可令
皇帝稱親濮安懿王稱皇王氏韓氏任氏竝稱后事方
施行而英宗卽日手詔曰稱親之禮謹遵慈訓追崇之
典豈易克當且欲以塋爲園卽園立廟俾王子孫主奉

祠事

宋史濮安懿王傳

治平四年八月葬英宗於永厚陵

宋史神宗紀

九月民役山陵者蠲其賦

宋史神宗紀

熙寧六年二月丙申永昌陵上宮火燔東城門

宋史五行志

元豐二年十月詔易太皇太后園陵曰山陵

宋史神宗紀

三年三月葬慈聖光獻皇后於永昭陵 宋史神宗紀

民緣山陵役者蠲其賦 宋史神宗紀

七年八月永安陵下宮生芝一本 宋史五行志

八年十月葬神宗於永裕陵 宋史哲宗紀

民緣山陵役者蠲其賦 宋史哲宗紀

元祐八年八月以太皇太后疾禱於諸陵 宋史哲宗紀

九月詔以太皇太后園陵為山陵 宋史哲宗紀

詔山陵修奉從約諸道毋妄有進助 宋史哲宗紀

十一月賜勞修奉山陵兵士 宋史哲宗紀

紹聖元年二月葬宣仁聖烈皇后於永厚陵 宋史哲宗紀

民緣山陵役者蠲其賦

宋史哲宗紀

八月權工部侍郎吳安持請自鞏縣東七里店至洛口別

開新河

宋史河渠志

吳安持等言廣武埽危急刷塌隄身二千餘步處地形稍高自鞏縣東七里店至見今洛口約不滿十里可以別開新河引導河水近南流行地步至少用功甚微王宗望行視并開井筒各稱利便外其南築大隄工力浩大乞下各屬官司躬往相度保明從之

元符三年八月葬哲宗於永泰陵

宋史徽宗紀

九月民緣山陵役者蠲其賦

宋史徽宗紀

建中靖國元年正月易大行皇太后園陵為山陵宋史徽宗紀

五月葬欽聖憲肅皇后欽慈皇后於永裕陵宋史徽宗紀

民緣山陵役者蠲其賦宋史徽宗紀

崇寧元年五月葬欽成皇后於永裕陵宋史徽宗紀

六月民緣山陵役者蠲其賦宋史徽宗紀

按欽成皇后聖瑞皇太妃朱氏哲宗母也薨後追尊為皇太后紀既不言易園陵為山陵此云緣山陵役者蓋誤

大觀二年十二月陪葬靖和皇后於永裕陵宋史徽宗紀

按靖和皇后徽宗皇后王氏也后傳作謚曰靜和四年改謚惠恭紹興中上謚顯恭

三年正月民緣園陵役者蠲其賦宋史徽宗紀

政和三年正月詔以天賜元圭遣官冊告永裕永泰陵宋史

徽宗紀

三月升永安縣為永安軍宋史徽宗紀

五月葬昭懷皇后於永泰陵宋史徽宗紀

按昭懷皇后哲宗后劉氏也崇寧二年冊為太后復上尊號曰崇恩以是年二月暴崩

六月民緣園陵役者蠲其賦宋史徽宗紀

永興軍路經畧安撫使范致虛被旨應援王室遣夏俶護

諸陵原三朝北盟會編

和尼渡盟津永安軍降金史太宗紀

按金史太宗紀書於天會四年十一月和尼傳則無永安軍降之文惟口大軍至河無船不得渡羅索遣和尼

循水上下和尼率軍三百自孟津而下度其可渡遂引軍以濟而見於羅索傳曰羅索取偃師永安軍羅縣孫和尼為羅索之子是時從羅索軍也從紀書之

粘罕陷西京

三朝北盟會編

粘罕在西京引諸金人看永安諸陵使人謁真宗仁宗陵至恭不謁裕熙二陵有焚燬之意禁止諸兵不得掠

陵廟器物

按粘罕於金史為宗翰本名尼瑪哈伐宋之役為左副元帥

割地使聶昌至永安軍孝義橋遇粘罕相見

三朝北盟會編

昌遇粘罕中軍約明日相見粘罕隨行立閤門明日盛

甲兵之衛接見使人其閤門舍人止曰撤傘用勝子贊

名引見國相昌曰國相金國何人也舍人曰宰相元帥
昌曰既爲宰相元帥乃金國之臣也昌亦南朝大臣止
當以敵國臣子客禮相見豈有南朝大臣臣禮見大金
臣子乎舍人曰樞密不畏死昌曰主憂臣辱主辱臣死
死不足畏節不可屈爭之移時粘罕旣不能奪乃以客
禮接見於氊帳中往反議論者終日粘罕云我兵已南
渡且到城下候樞密割地回日方旋師蓋以南朝曾失
信也昌曰皇帝仁聖未嘗失信於天下頃以童貫王黼
苟利忘義失信大遼致今日國家有意外之難非國家
失信於大金也且國相今春歆誓結和勒兵不渡今復

背約南侵非失信耶粘罕曰不敢廢和議止候得地昌
 曰被命而來不敢輒易若國相兵不北還昌雖死地亦
 不敢割粘罕大怒入後帳中約退昌昌歸館不給食者
 一日加甲兵圍其舍以太師楊天吉擁千兵館伴昌往

河東

二年四月差御史一員往西京視陵寢三朝北盟會編

按是時金人已歸張邦昌避位孟太后垂簾聽政也

建炎元年五月命傅雱往永安檢視陵寢三朝北盟會編

按建炎通問錄曰建炎元年皇帝車駕到南京卽寶位雱差出自西京永安陵頭檢視陵寢高宗卽位爲五月也

命西京留守司修奉祖宗陵寢

宋史高宗紀

劄西京翟興團結本處義兵保護陵寢

三朝北盟會編

二年四月金兀室余覩敗韓世忠於永安後澗

三朝北盟會編

三年五月翟興至永安軍朝謁諸陵

三朝北盟會編

翟興既敗揚進遂平京西南北兩路收復河南府由是

躬率將吏至永安軍朝謁諸陵將士至陵所皆泣下感

愴不已

四年八月翟興令其子琮及趙林敗金人於永安軍

三朝北盟

會編

金人侵犯陵寢翟興遣其子琮及統領官趙林率兵由

河陽至鞏縣永安軍邀擊屢戰皆捷襲逐至澠池縣出界

紹興元年九月詔歲再遣使省謁諸陵

宋史高宗紀

九年正月遣判大宗正事士儂兵部侍郎張燾詣河南修

奉陵寢

宋史高宗紀

和議成范如圭請遣使朝八陵遂命判大宗正士儂與

燾偕行且命修奉令荆湖帥臣岳飛濟其役燾與士儂

道武昌出蔡潁河南百姓歡迎夾道以喜以泣曰久隔

王化不圖今日復為宋民五月至永安諸陵朝謁如禮

燾等入柏城披鉏荆棘隨所葺治留二日而還自鄭州

歷沐宋宿泗淮南以歸卽奏疏白金人之禍上及山陵
雖殄滅之未足以雪此恥復此讐也陛下聖孝天至豈
勝痛憤顧以梓宮兩宮之故方且與和未可遽言兵也
祖宗在天之靈震怒旣久豈容但已異時恭行天罰得
無望於陛下乎自古戡定禍亂非武不可狼子野心不
可保持久矣伏望修武備俟釁隙起而應之電掃風驅
盡俘醜類以告諸陵夫如是然後盡天子之孝而爲人
子孫之責塞矣上問諸陵寢如何燾不對惟言萬世不
可忘此賊上黯然燾又奏諸陵下石澗水自兵興以來
涸竭幾十五年臣至陵所修誠禮畢水卽大至父老歎

異以為中興之祥上喜飛請以輕騎從灑埽實欲觀釁

以伐謀檜白帝止其行

宋史張燾傳三朝北盟會編宋史岳飛傳

按孟邦雄發永安陵見宋史劉豫傳不得其年附記於此

十年間六月岳飛遣將楊遇復南城軍

通鑑輯覽

方輿紀要南城軍在鞏縣西南

七月岳飛遣將張應韓清入西京會李興復永安軍

宋史高宗

紀

岳飛檄陵臺令行視諸陵葺治之

宋史岳飛傳

知河南府李興遣將士詣永安酌獻諸陵

三朝北盟會編

興九月退保於永安白馬山為李成所圍興雖在圍中

至歲時伏臘專遣將士齎書取閒道詣永安

三十二年二月吳玠遣將復永安軍

宋史高宗紀

按時金人渝盟其主亮雖已被弑而和議未就迨隆興二年和議既成則地界仍如紹興之時復歸金矣

端平元年正月史嵩之露布告金亡謹遣郭春按循故壤

詣奉先縣况埽祖宗諸陵

宋史理宗紀

按奉先縣不見地理志疑永安縣升為軍之後縣改是名

三月詔遣太常寺主簿朱楊祖閣門祇候林拓詣洛陽省

謁八陵

宋史理宗紀

朱楊祖林拓朝八陵諜云蒙古兵傳宋來爭河南府哨

已及盟津陝府潼關河南皆增屯設伏又聞淮閩刻日

進師衆畏不前孟洪曰淮東之師由淮泗漕汴非旬餘
不達吾選精騎疾馳不十日可竣事迨師至東京吾已
歸矣於是晝夜兼行與二使至陵下奉宣御表成禮而

歸 宋史孟
珙傳

四月詔遣朱復之詣八陵相度修奉 宋史理
宗紀

八月朱楊祖林拓朝謁八陵回以圖進上問諸陵相去幾

何及陵前澗水新復楊祖悉以對上忍涕太息 宋史理
宗紀

金

貞元元年更永安縣為芝田 金史地
理志

按宋史史嵩之傳已稱奉先縣且宋久升為永安軍
矣此曰宋名永安貞元元年更蓋仍用宋舊名也

大定五年六月河南府進芝草十三本云得於芝田石上

金史五

行志

十一年三月命有司以天水郡公旅櫬依一品禮葬於鞏

洛之原

金史世宗紀

按天水郡公卽宋欽宗皇帝也

十七年正月詔宋天水郡王被害子孫葬於河南舊塋

金史

世宗紀

按天水郡王宋徽宗皇帝也子孫以正隆六年爲海陵所殺

元

至元十五年十二月河水清

元史五行志

自孟津東柏谷至汜水縣蓼子谷上下八十餘里澄瑩見底數月始如故

天歷元年十月陝西兵至鞏縣黑石渡

元史文宗紀

文宗即位之詔已播告天下而陝西官府結連靖安王等起兵突出潼關迤邐前進河南行省平章政事阿爾哈雅即日部分行事出右丞圖卜特穆爾廉訪使巴延在虎牢師與西兵遇於鞏縣之黑石渡而湖廣所徵太原之兵最爲可用甫至未及食或趣之倍道以進轉戰及暮兩軍殺傷與墮澗谷死者相等而虎牢遂爲敵有

節錄元史阿爾哈雅傳

至正四年六月鞏縣大雨伊洛水溢漂民居數百家

元史五行

志

十四年六月鞏縣大雨伊洛水溢漂民居溺死三百餘人

元史五行

行志

十二月達實巴圖爾復鞏縣

元史順帝紀

二十年正月察罕特穆爾請以鞏縣改立軍州萬戶府招

民屯種從之

元史順帝紀

二十一年鞏縣蝗食稼俱盡

元史五行志

二十六年七月鞏縣大霖雨地震山崩

元史五行志

明

洪武元年五月甲申登封鞏縣雞翎山并天堂山寨復叛
徐達遣指揮豐諒率兵討平之指揮任亮克露豹王山等
寨參政傅友德取凌青黑山二寨

五年祀宋祖於鞏

明史

攷明清兩代不時致祭宋陵儻按年臚書繁複特甚殊
令讀者生厭五年之祀載在明史故紀特筆此外舊志
所列彙錄於後並書所遣官員暨致祭緣由亦有舉莫
廢之意云爾

洪武四年遣秘書監丞陶誼祭告三十五年遣道士任實
沈與真祭告永樂三年遣鞏縣知縣劉安祭告宣德元年

命翰林周敘祭告順治八年帝親政使太常寺卿段國璋祭告康熙元年帝卽位使通政使霍叔瑾祭告十五年建儲祭告二十一年疆宇蕩平使兵部左侍郎焦毓瑞祭告二十七年孝莊后祔廟使大理寺卿陳汝器祭告三十六年塞北永清使兵部督捕左理寺官胡會恩祭告四十二年五旬萬壽使左副都御史張睿祭告四十八年復儲使太僕卿特升宗人府祖允圖祭告五十二年六旬萬壽使都察院左副都御史明安祭告五十八年孝惠后祔廟使翰林院編修蔣漣祭告雍正元年帝卽位使大理寺卿覺羅常泰祭告二年聖祖配享禮成使內閣侍讀學士班第

祭告乾隆元年帝卽位祭告二年世宗配享禮成使內閣
學士兼禮部侍郎雙喜祭告十四年中宮攝位慈寧晉號
祭告十七年皇太后六旬萬壽祭告二十年平定準噶爾
祭告二十四年蕩平回部祭告二十七年皇太后七旬萬
壽祭告三十七年皇太后八旬萬壽祭告四十一年平定
金川祭告四十五年七旬萬壽祭告五十年皇帝御極祭
告同治元年帝卽位祭告光緒元年帝卽位遣總兵崔廷
桂祭告十三年遣總兵牛師韓祭告宣統元年帝卽位祭
告

以上所列因檔案湮沒乾隆後無從考察卽光緒開舉

祀多次亦語焉不詳故於嘉靖志乾隆志外所錄甚鮮

十七年大水無禾上命駙馬都尉李祺賑卹

乙丑志

二十八年徵邑人張祺劉醇康寧授官有差

乙丑志

永樂十六年縣丞華胥開神隄渠

方輿紀要

景泰六年縣丞趙昇修縣城

己酉志

成化十一年知縣柯忠重修縣城

己酉志

正德七年霸州流賊劉某破縣城知縣楊弘去官

按明史紀趙燧之亂揭明汜水偃師獨不言破鞏茲據

生員劉麟妻韓烈婦節義碑紀壬申三月二日之禍歷

歷可指嘉靖鞏志載同時殉難婦尚有五人當賊初至

時城中閉關固拒賊踞城南虎頭山猛攻因陷落殘殺甚衆知縣楊弘因而赴部改官追賊去斷其山頸增修堠口窩鋪爲懲前毖後之計

十年知縣張稷擢建書院

嘉靖八年蝗 圖書集成
職方典

二十二年大水縣城傾頽知縣周泗增修 已酉志

三十二年旱後大雨洛水溢浸城之半

隆慶六年大水 已酉志

萬歷十三年葺城初加甃石李再思汪本英先後繕修廳分巡道丁惟寧之命

十四年修縣城己酉志

邑人張可久有新鞏城記

四十年築土隄五百丈以衛城己酉志

崇禎三年夏五月旱己酉志

分巡道楊嗣昌過鞏代民禱雨果得甘霖鞏人立石記

之文職文敏

八年正月流賊自盧氏攻鞏縣綏寇紀畧

賊攻城將克縣官及紳積薪於門舉火賊懼不敢入

十一月李自成自雒走鞏縣綏寇紀畧

高迎祥李自成張獻忠合陷陝城東下攻雒豫撫陳必

謙監軍道戴東旻分率左良玉祖寬二軍兼行收諸賊
聞兵至而去迎祥自成走偃師鞏縣獻忠走嵩汝

祖寬破賊整齊王於九嵩賊潰而爲二東走偃鞏南走汝

州明史紀
事本末

九年八月左良玉殺賊於登封之唐莊賊從大小金店西

奔一越北山向鞏境奔去綏寇
紀畧

十二年地震乙丑
志

十三年大旱饑乙丑
志

是歲大饑人相食盜賊四起李際遇作亂於登封結申
張任三營爲羽翼盤踞御寨土寇王升以衆應之聚至

五千餘人知縣宋文瑞檄指揮馬某典史魏光策捕之

不克賊勢愈熾逼近城邑

乙丑志

張乾二率鄉團拒巨匪李際遇

按乾二係神堤村諸生年二十餘倜儻權奇登封李際

遇倡亂鞏縣洛水以南俱爲殘破乾二率衆禦之戰於

城南五里堡賊大敗前後三十餘戰賊未逾洛水一步

十六年八月流賊破城署理知縣閻士選死之

乙丑志

詳名宦傳

清

順治四年敘開闢首事功諸生張乾二除陝西通渭知縣

康熙十八年春饑

乙丑志

民人粒食者十無二三榆皮草根皆盡知縣蔣徵猷煮

粥蠲米存活甚衆

乙丑志

二十九年夏秋疫

牛疫牛死十之七八四野半以人耕

夏六月淫雨為災溢壞縣城

乙丑志

天作霖雨半月不止山水泛漲淹沒田禾東門外水高

丈餘倒灌入城房舍傾圮百餘家知縣多時琦察訪災

情遇無力修建者資助之

乙丑志

雍正十二年秋大水淹十八蘇村

乙丑志

十三年秋七月大水浸縣城知縣季璟率民多方守禦幸保無虞

秋大雨霖己酉志

乾隆九年夏四月饑知縣邱軒昂以工代賑修縣城己酉志

十一年特詔蠲免錢糧己酉志

十五年詔巡幸嵩洛蠲免十四年以前積欠帶徵錢糧己酉志

十六年裁縣訓導己酉志

三十一年特詔照依康熙年例普免漕糧一次己酉志

三十五年特詔蠲免錢糧己酉志

四十三年春正月元日大風晝晦

己酉志

特詔本年錢糧緩至麥後開徵又特詔豫省四十五年輪

免錢糧卽於本年先行蠲免又特詔存倉薊穀儘數出借

加恩自本年秋收爲始分作三年帶徵

己酉志

五十年大風晝晦

采訪

特詔歷年緩帶徵各項錢糧倉穀蠲免十分之三

己酉志

大軍過縣

甘肅回民張阿渾反犯隆德靜寧圍伏羌朝命海蘭察

福康安往剿經過縣境

採訪

五十一年蝗食苗盡

采訪

五十六年修縣城采訪

知縣朱元炳主其事有紀事碑在舊城東城門上

嘉慶十八年大饑人相食

春夏旱麥歉收秋禾數種未成後得雨種蕎麥花實並

茂又遭毒霧枯焦自嘉慶八九年來饑饉荐臻民鮮蓋

藏更被此災流亡載道甚有人相食者采訪

道光十二年秋八月洛水溢灌縣城

八月十四日洛河漲衝破涵洞城內水深四五尺街衢

行舟衙署倉廩舍皆頽壞人民多逃亡者采訪

十五年自去秋八月不雨至今五月雨采訪

建節孝總坊於縣南門外

十二年邑人牛天光等兩次舉報節孝一百一十人重

至是奉部覆准建總坊教諭馬時芳率士紳興築至今

猶存

采訪

二十五年洛水涸舟楫不通

采訪

二十六年旱麥未布種

采訪

二十七年大饑

春夏大旱秋淫雨月餘鄉民散四方轉溝壑鬻妻子者

無數

采訪

秋七月詔河南巡撫鄂順安賑卹

東華錄

九月命文慶張澧中等來查賑

東華錄

二十八年春饑夏麥大稔

民逃荒者多病故歸者十之一歸後因荒出賣之田官

許備價贖回買主不願贖者畝倍其值然亦亟紛擾矣

采訪

咸豐元年修東西大路名交讓路

河南府知府賈臻捐廉修路東自老犍坡西至黑石關

每數里鑿龕以容車來往交讓故名

采訪

三年夏太平天國吉文元入鞏知縣王恩泰逃匿

采訪

洪秀全已據金陵遣吉文元入河南圍開封不克遂由

鄭州汜水至鞏攻破石關南河渡等寨殺傷數百人知

縣王恩泰逃匿恩泰賄賂公行刑罰兵亦頗有紀律民

有獻物者厚賜之留數日渡河攻懷慶采訪

五月粵軍林鳳翔李開方帥眾數十萬由鞏渡河中州先哲傳陳

仲牲傳

按上兩節少有出入未審孰是姑兩存之

又據采訪冊云軍首號大頭王據鞏東站等處連營十

餘里打糧括人禁止姦殺然環城三十里亦多有被毒

者南大寺石窟寺神隄大王廟概遭毀燬石欄被燬尤

慘人呼為紅巾隊以紅巾裹首也五月二十日抵鞏二

十六日北渡亦有南走密縣者

民間參用鐵錢

四年夏大稔

三年五年俱豐登麥每斗錢二百文

采訪

五年詔緩徵黃河灘地錢糧五百餘頃

據邑人頌河南知府賈臻碑極言黃河灘地錢糧累民

臻據情訴諸大吏懇為轉奏得旨緩徵五百餘頃邑民

感戴至今

采訪

七年冬十二月蠲緩新舊額賦有差

采訪

八年夏四月雨雹大如雞卵麥禾俱傷樹無完枝

采訪

大旱疫

采訪

按自六年來屢遭旱蝗五穀不登糧價日昂以羣匪擾亂商賈不行粵軍去後防其北渡河船被官鑿毀漕糧兵差催科不已民無復田園樂矣

十一年秋八月捻匪龔瞎子張樂行竄鞏知縣袁修翰督民團堵禦城陷

采訪

粵西洪秀全建太平天國江南毫潁壽三州山東曹縣等處土寇蠡起首領張樂行龔瞎子劉狗陳四眼狗劉大淵趙喜元等望風附降長驅河南所向侵暴龔張等至汜水鞏縣知縣袁修翰遣民團長白松齡等守虎牢

關丁元吉等守仙家店自帥團勇駐明月坡即老八月初九日

初九日攻虎牢明月坡不克十一日攻破仙家店袁令

退守茶庵次日龔張等分三隊前進團勇不支遂潰鞏

城一帶燒廬舍毀什物掠牛馬居民巷空即逃匿山谷

者亦恆被害此吾民一浩劫也

十五日鞏練勇禦擒匪於城南十方院敗北

龔張等畧地至黑石關敗洛偃練勇以水漲不得渡鞏

練勇禦之十方院遇伏不能進遂潰賊畧芝田鎮還采訪

十六日擒匪大畧東去采訪

九月鞏縣練勇守仙家店虎牢關

山東股匪復至河陰鞏偃二縣練勇拒守仙家店虎牢

關數日匪東去

采訪

冬鞏民始築寨

太平日久人不識兵鞏民恃有山險謂莫予毒捻匪入境搜巖索谷無所不至始悟山居難恃競議築寨自衛

而同時百堵興矣

采訪

同治元年春三月魯捻至明月坡尋去

時朝議主撫山東捻匪紛紛投降然一經約束尋復叛

去初二日晚有捻度虎牢至明月坡旋遁去

采訪

罷各縣鄉團局

自捻匪豕突狼奔羣盜乘之橫決不可制豫省幾無寧
歲朝議辦鄉團使民自爲戰守及局立弊生官糧旁落
擅生殺攬詞訟強科派所至騷然鞏偃洛汝爲尤甚
府漸悟非計一切罷之

采訪

八月東捻薄鞏縣知縣袁修翰逃

東捻分犯數縣連營百餘里烽火夜明南至嵩麓北至
河岸蹤迹靡常諜報告警知縣袁修翰逃入民寨捻去
復視事方亂之萌也州縣棄城池者俱逮治罪至是賊
來官去賊去官來視若等閒矣

采訪

冬十一月二十六日地震

采訪

二年立夏前三日大雪天寒如冬人畜多凍死采訪

秋八月捻匪分犯鞏縣冬鄉民復築村寨

捻匪至登封分竄至鞏逃匿山谷者多被害至是紛紛

就近築寨采訪

三年春三月僧格林沁大軍過境

僧格林沁受命討捻轉戰數百里屢殲渠魁時捻西竄

僧追擊之至鞏城人民逃避一空兵勇分住民宅采訪

四年立秋前數日始種禾禾豐收采訪

六年春夏大旱

自去年夏不雨至是年五月草木枯死匪徒蠢動恣行

劫掠采訪

七年春饑夏麥大稔秋禾棉皆豐登采訪

九年夏征回大軍過境

兵興以來鞏洛為東西孔道兵勇多無紀律村市被其

蹂躪聞官軍過逃避一空采訪

十一年夏大稔采訪

自咸豐六年以來穀價昂貴至是始賤采訪

十三年秋九月十七日雨雪采訪

光緒元年夏大稔

秋七月大旱禾枯死采訪

二年春夏大旱

自去冬無雪麥苗枯槁盜賊竊發貧民勒富戶振貸

采訪

冬十二月官發倉賑卹

采訪

三年知縣李掄元招募防盜

連歲凶荒饑民充斥無賴者聚而為盜搶劫村莊發掘

塚墓暗殺客商行旅以兵自隨知縣諭富戶招募以備

非常

采訪

秋冬大饑人相食

自去冬至春民間以麥苗榆皮為食漸及樹葉蒺藜秋

冬後多鬻妻棄子殺戮牛馬六畜甚有食及同類者餓

孳橫野流亡載道村落爲墟采訪

詔發帑振濟縣設粥廠

詔發帑銀二十萬上縣得二千兩中縣千五百兩下縣千兩更發倉米亦如之知縣李掄元旣辦鄉團以弭寇盜復得銀數千兩又勸富戶捐銀萬餘兩設男女粥廠各一保赤局一十里內每人日食一稀粥十里外每人給米四兩縣分五路共散飯票數千紙采訪

修築縣城

知縣李掄元以工代賑使饑民修城至十二月始罷采訪
四年免本月上忙正雜糧

政府命刑部左侍郎項城袁保恆辦河南振務特為奏

免采訪

大疫

凡赤貧極貧三年已十死八九四年入春以來因疫而

死者更無算采訪

詔緩征前年糧漕

以李鶴年奏請得蠲免十分之一采訪

夏四月雨

自去年四月旱至是年三月中旬始得微雨四月復得

雨一犁采訪

秋有年九月民始種麥采訪

冬城內仍設粥廠采訪

五年春民間始復興學

數年凶荒閭巷書聲幾絕至是漸有學校采訪

十一年刀匪劫篡餉銀於城西石河道采訪

十三年秋大雨陰雨連綿四十五日采訪

十四年耶蘇教來縣采訪

十六年設石方局於東站采訪

十八年秋七月十三日地震有聲采訪

十九年縣城設局抽煤釐采訪

二十一年秋大疫傳染極廣采訪

二十二年設保甲局采訪

二十四年夏洛水溢

自洛陽至洛汭兩岸百餘里廬舍秋禾俱沒采訪

罷武科舉采訪

二十六年無麥

去歲麥未下種秋禾歉收民不堪命采訪

二十七年春二月初九日大風晝晦

紅風大作對面不見人室內皆燃燈道路人畜死者無

數春閒凡起紅風數次以此為最劇采訪

按是歲穀價翔貴乞丐充斥鬻衣物貨簪珥者相率於道

夏六月洛水溢秋禾淹沒

采訪

始架設電綫

采訪

秋九月二十四日清德宗暨慈禧太后回鑾駐蹕縣

前年義和拳肇亂入國聯軍入京師兩宮走西安至是和議成回鑾道經鞏縣縣備三行宮黑石關縣城官店行不戒嚴紳民跪道左貢獻

采訪

二十八年發昭信股票

采訪

三十一年加煙酒稅

采訪

設戲捐采訪

罷科舉采訪

按八股取士久為世所詬病戊戌變法改八股為策論
旋又恢復至二十八年二次改試策論連舉鄉會試而
次至是始罷除

三十二年豁免陵祭差徭采訪

三十三年裁城守營采訪

宣統元年自五月至八月洛水漲溢三次八月大疫中者

即日殞命采訪

車站設巡警局采訪

冬十月初二日土匪張化南等劫掠芝田鎮

土匪張化南劉燕王永福等突入芝田偽為軍隊覓地

駐防觀者林立將出鎮虎嘯一聲商賈居民皆驚散飽

掠颺去

采訪

三年全縣分區自治設籌備憲政事務所

采訪

民國

元年勅立縣議事會參事會

采訪

夏六月至冬十月不雨麥未下種

采訪

派委禁止鴉片

采訪

二年設統計處

采訪

初行礦區礦照采訪

設清鄉局旋改為守望社采訪

開辦驗契采訪

三年夏五月蝗秋七月蝻

食禾殆盡縣知事率鄉民捕治采訪

改守望社為保衛團采訪

設孔廟奉祀官采訪

發行國家公債票采訪

實行印花稅采訪

車站設貨捐局采訪

四年加層率稅采訪

加收丁地附稅

每徵銀二兩加附稅錢一千二百文采訪

發行國家公債票采訪

發行儲蓄票采訪

揀選土物工藝赴巴拿馬賽會采訪

五年減收丁地附稅

每徵銀一兩減為七百文采訪

夏六月蠶食稼

知事飭民捕治縣署計斤收買采訪

六年漕收丁地附稅

每徵銀一兩減為三百五十文采訪

七年發行地方公債票采訪

加菸酒牌照稅采訪

夏六月二十七日洛水暴漲淹沒縣城

六月二十六日雨兩晝夜洛水大溢山水並發城外水

深六七尺夜西北城陷大水奄至倏成澤國官署案卷

居戶牲畜財物概遭淪沒猝移官署於東垣城內積水

素多至此益不可居矣采訪

八年設屠宰稅局采訪

按是年疫癘流行災區極廣有自合衆國來者謂災疫相同

夏五月西北軍駐黑石關

直皖戰起五月二十六日西北軍自洛陽進據黑石關

吳佩孚帥第三師扼守虎牢相持月餘西北軍宵遁采訪

秋七月洛水溢灌縣城采訪

九年停收丁地附稅

三月徵收附稅原欸存留采訪

加補助捐

四月存留附稅原欸改兌補助捐采訪

秋七月偃匪段洪濤周烈等盤據芝田鎮縣知事毛龍章率民團往剿

夏四月偃匪周烈等自縣西突竄聖水六月竄趙窰掠財架票民不堪命七月段洪濤周烈數股竄張莊聖水虜掠一空旋自虎山坡入東村芝田大肆焚燒復犯塢羅隄東等村匪李合盤踞瓦功川知事毛龍章率民團往剿擒李合父李大套於凌溝村斬之并斬史根柱等於夾津口餘匪潛逃

采訪

冬十月土匪朱保成屈子舟復入運溝縣南大震

朱屈等大張旗鼓嘯聚運溝附近居民四逃十一月縣

知事毛龍章豫授民團方畧偕同區長李玉田與匪血
戰於五至嶺幾瀕於危縣隊長孫志曾與芝田區勇白
成俱陣亡匪鬻解之采訪

十一月初七日地震采訪

十年發行臨時地方公債采訪

十一年夏登封股匪袁象昇竄鞏秋九月復竄鞏

袁匪犯鞏塢羅上下數十里悉被其虐九月又至自塢

羅北至蔡莊幾無完土采訪

十二月偃匪兩次竄鞏鞏匪應之全境騷然采訪

設煙酒公賣局采訪

十三年發行軍用公債

采訪

冬吳佩孚軍夜渡黑石關

直奉再戰吳佩孚離洛吳軍夜渡黑石關拆毀鐵道

采訪

十四年春陝西第二軍胡景翼與中央三十五師憨玉琨大戰於黑石關憨軍敗退

直奉方戰北京政變和局既成陝西第二師胡景翼先

由河北開道至汴俄與中央三十五師憨玉琨在黑石

關兩岸相持胡東憨西附近村野飛芻輓粟供給不暇

二月初八日開始攻擊約一星期憨軍潰退

采訪

發行金融公債

一萬五千元

采訪

復設貨捐局

采訪

十五年春正月某軍劫寇家灣益家窩

正月十四日寇家灣益家窩等村方鬧元宵某軍一哨

突至掠奪戲劇服飾及芝田警察分所槍械電話鐘表

細軟服物飽颺而去於是蝟起螳舉不可爬梳矣

采訪

夏五月偃匪劉申劫五岳廟教員學生

偃師著匪劉申等橫行鞏洛閒掠人勒贖於五月某夜

掠去五岳廟高小校教員一人學生十人擊斃學生趙

忠範

采訪

冬十一月股匪姜有王振武等嘯聚芝田區團勇劉任劉
印劉竅劉松照張三往剿死之

股匪姜有等起東南山恣行搶劫芝田各村民團往剿
追至密縣負隅鏖戰團勇劉任等五人陣亡

加捲煙特稅

采訪

設契稅經理局

采訪

十六年發行特種公債

七萬五千元

采訪

發行地方公債

采訪

派認農工銀行股票

采訪

十七年移縣治於鰲嶺

